

ESDRAS

(Édra)

**Āëxgacü ga Chíru nanaxunagü nax wena
naxügüaxüçax ga Tupanapata**

1 ¹Rü guma taunecü ga nagu āëxgacü yangucuchicü ga Chíru ga Pérchiaanecüāxarü āëxgacü, rü Cori ya Tupana nayanguxëxë ga norü ore ga noxri Yeremiaçxwa nüxü yaxuxü. Rü yemaçax ga nüma ga Tupana rü āëxgacü ga Chírüāëwa ínananguxëxë nax guxü ga nachixüānegü ga nüma namaxā inacüāxümaxā naxunagüaxüçax ga ñaa ore ga ümatüxü ga ñaxü: ²“Rü choma i Chíru i Pérchiaanecüāxarü āëxgacü rü chanaxunagü i ñaa ore. Rü nüma ya daxüçüçax ya Cori ya Tupana rü marü choxmexwa nanangexmagüxëxë i guxüma i nachixüānegü i ñoma i naanewa ngëxmagüxü. Rü choxü namu nax naxçax chanaxüxüçax ya wüxi ya napata nawa ya yima íane ya Yerucharéü i Yudáanewa ngexmane. ³Rü ngëmacax i guxāma i pema ya Iraéanecüāxgü ixīgüxe, rü name nixí nax Yerucharéüçax pewoeguxü nax wena penaxügüxüçax ya napata ya yimá perü Tupana. iRü nüma pexü

nangüxëxë nawa i ngëma puracü! ⁴Rü yíxema petanüxügü ya tama woeguchaüxe, rü name nixí i naxchirumaxā, rü tümawexümaxā, rü ñonamaxā nüxü tarüngüxëxë i ngëma woeguxü. Rü naétü rü name nixí i nüxna tanaxā i tümaarü āmare naxçax ya Tupanapata ya Yerucharéüwa wena tá naxügüne”, ñanagürü ga āëxgacü ga Chíru.

**Iraéanecüāxgü rü wena
Yerucharéüçax nawoegu**

⁵Rü nüma ya Tupana rü yema Yudátanüxüarü rü Bëyamítanüxüarü āëxgacügüāëwa rü chacherdótegüāëwa nananguxëxë ga wüxi ga ngüchaü nax Yerucharéüçax nawoeguxüçax nax wena naxügüaxüçax ga Tupanapata. ⁶Rü yema Iraéanecüāxgü ga tama Yerucharéüçax woeguchaüxü, rü yema woeguxüxü narüngüxëgü diërumaxā, rü úirumaxā, rü wocagümaxā rü norü yemaxügü ga tatanüxümaxā. Rü naétü nüxna nanaxägü ga āmaregü Tupanapataçax. ⁷Rü nümatama ga āëxgacü ga Chíru rü nanawoeguxëxë ga yema cópagü ga úirunaxçax rü guxüma

ga togüamachigü ga Tupanapataarü yemaxügu ga ãëxgacü ga Nabucudonochó Yerucharéüwa naxü rü norü tupanapatagu yanuxü. ⁸Rü nüma ga Chíru ga Pérchiaanecüãxarü ãëxgacü rü norü diëruarü dauruxü ga Miridátexü namu nax Yudáanecüãxarü ãëxgacü ga Chebachárana nanaaxüçax ga yema Tupanapataarü yemaxügu.

.....

¹¹Rü yema Tupanapataarü yemaxügu ga úirunaxçax rü diërumünaxçax rü 5,400 nixí ga norü mu. Rü guxüma ga yema yemaxügu rü Chebachára nayana ga yexguma Babiróniaanewa natáeguxgu namaxá ga yema duüxügu ga Yerucharéüçax woeguxü.

.....

Iraéanecüãxgü ga Babiróniaanewa woeguxü

2 ⁶⁴⁻⁶⁵Rü 42,360 nixí ga norü mu ga yema Iraéanecüãxgü ga woeguxü. Natürü tama yematanügu nixugü ga norü puracütanüxügu rü naxütaxügu ga 7,337 ga duüxügu ixügu. Rü yexgumarüxü ta nayexmagü ga 200 ga wiyaetanüxü ga yatüxü rü ngexügu. ⁶⁶⁻⁶⁷Rü 736 ga cowarugü nüxü nayexmagü, rü 245 ga múlagü, rü 435 ga caméyugü rü 6,720 ga búrugü. ⁶⁸Rü yexguma Yerucharéüwa nangugüga ga yema Iraéanecüãxgü, rü ñuxre ga norü ãëxgacügu rü norü ãmaregü inaxägu nax wena Cori ya Tupanapata namexëëgüxüçax. ⁶⁹Rü yema wüxichigü nüxü tauxchaxü ga diëru nixí ga inaxägüxü naxçax ga guma Tupanapata. Rü 488 quíru naguxü ga úiru, rü 2,750 quíru ga diërumü, rü 100 ga

chacherdótegüchiru ga mámüxü nixí ga inaxägüxü. ⁷⁰Rü yema chacherdótegü rü yema Lebítanüxügu rü ñuxre ga yema togü ga duüxügu rü yexma Yerucharéüga naxächüügu. Natürü yema wiyaetanüxügu, rü yema Tupanapataarü ñaxarü dauruügu, rü yema Tupanapatawa puracüexü, rü yema togü ga Iraéanecüãxgü rü wüxichigü norü ñanewa ningugüetanü.

Yerucharéüwa rü wena inanaxügu nax Tupanacax nangutaquëxëgüxü

3 ¹Rü yexguma 7 ga tauemacüwa nanguxgu nax Babiróniaanewa ne naxíxü rü nüma ga Iraéanecüãxgü ga norü ñanewachigü ngugüxü rü Yerucharéüwa naxí nax yema yangutaquëxëgüxüçax. ²Rü yemacax ga Yochué ga Yochadá nane rü namücügu ga chacherdótegümaxá rü Chorobabé ga Charatié nane rü natanüxügümaxá wenaxarü nanaxügu ga Tupanaarü ãmarearü guchicaxü nax yema ínaguaxüçax ga Tupanaarü ãmaregü, yema mugü ga Moiché úmatüxü nüxü ixuxürüxü. ³Rü yema Tupanaarü ãmarearü guchicaxü rü nüxíraxüxü ga nachicagutama nanaxügu rü meama natai. Rü yema nax naxçax namuüexü ga yema duüxügu ga yema naanewa yexmagüxü, rü yemacax guxüguma ga paxmama rü yáuanecü rü Cori ga Tupanacax ínanagugüxü ga norü ãmaregü. ⁴Rü yema Moiché úmatüxü ga mugü nüxü ixuxürüxü rü nanaxüchigagüxü ga yema naixatümaxá nügu nax yaxüpataxü. Rü guxüma ga ngunexügu rü ínanaguüxü ga ãmaregü aïxrugumarüütama yema Moiché

ümatüxü ga mugü nüxü ixuxürixü. ⁵Rü yexgumarüxü ta ínanagu ga ámaregü ga ngüchigaarü ngunexügu íguxü, rü yema ámaregü ga yexwaca ixüxcü ga tauemacügu íguxü, rü yema ámaregü ga togü ga petagu Tupanacax íguxü. Rü yexgumarüxü ta ínanagu ga yema ámaregü ga texé tümaarü ngüchaümaxá Tupanacax íxámaregüxü. ⁶Rü yema nax Tupanacax ínaguaxü ga ámaregü, rü inanaxügüe meama 7 ga tauemacüarü ügügu naxüpa nax inachixëëgüaxü ga yema naxtapüx ga guma Tupanapata. ⁷Rü ñuxüchi naxcax nadaugü ga ípataarü üruügu ga nutaarü ñaxcuruügu rü corapínagü, rü diërumaxá nüxü nanaxütanü. Rü Líbanuanewa ga Tíruwa rü Chidáüwa naxcax nataxegü ga mürapewa ga ocayiwagü. Rü yema mürapewa rü ñnamaxá, rü bínumaxá, rü orfbuarü chíxümaxá nanaxütanügü. Rü yema mürapewagü rü Líbanuanewa nixí ga ne nanaaxü. Rü márpechinügu nayana ñuxmata Yópearü türewa nangugü, yerü yemaacü nixí ga nüxna naxágaxü ga Pérchiaanecüáxarü äëxgacü ga Chíru.

**Inanaxügüe ga wena nax
naxügüáxü ga Tupanapata**

⁸Rü nüma ga Chorobabé ga Charatié nane rü Yochué ga Yochadá nane rü nüma ga chacherdótegü rü Lebítanüxügü rü guxüma ga yema Iraéanecüáxgü ga wenaxarü Yerucharéücax woeguxü rü inanaxügüe ga yema puracü nax wena namexëëgüaxü ga Tupanapata. Rü yema puracü rü inaxügü ga yexguma marü taxre ga taunecü ínguxgu rü naétü taxre

ga tauemacü yixíxgu ga Yerucharéüwa nax nayexmagüxü. Rü yema puracümaxá inacuaxgü ga yema Lebítanüxü ga 20 ga taunecüarü yexera nüxü yexmagüxü. ⁹Rü nüma ga Yochué rü nanegü rü naeneegü rü nügü nade, rü wüxitücumü nügümaxá naxü namaxá ga Camierí rü nanegü ga Yudátaagü ixígüxü. Rü yexgumarüxü ta nügütanüwa nanaxügüxëxë ga Enadáx nanegü rü naeneegü rü natanüxügü ga Lebítaagü ixígüxü. Rü nümagü nixí ga namaxá inacuáxü ga yema Tupanapataarü mexëëruügu. ¹⁰Rü yexguma yema Tupanapataarü mexëëruügu nanucugu ga nüxíraxücü ga nutagü ga natapüxparagü nawa rütogüine, rü nüma ga chacherdótegü rü mea nügü nangaxáëácüma yexma nachigü rü nayacue ga norü cornétagü. Rü yema Lebítanüxü ga Achátaagü rü yéma nanana ga norü paxetaruügu ga namaxá Tupanaxü yacuaxüügüxü, yema äëxgacü ga Dabí unagixürixü. ¹¹Rü ñuxre ga nümagü rü nawiyaegü rü Tupanaxü nicuaxüxügü. Rü yema togü rü nanangáxügü rü ñanagürügü: —iNüxna moxë pexá ya Cori ya Tupana erü nüma rü tamaxá namecüma rü ngëma norü ngechaü i taxcax rü taguma nagux! —ñanagürügü. Rü guxüma ga duüxügü rü nataxëgü, rü tagaácü Cori ya Tupanaxü nicuaxüxügü, yerü marü inaxügü ga nax wena namexëëxü ga Cori ya Tupanapata. ¹²Rü muxüma ga yema chacherdótegü rü Lebítanüxü rü äëxgacügü ga iyaxü ga marü nüxü daugüxü ga guma nüxíraxüne ga Tupanapata, rü yemagü rü tagaácü naxauxe, yerü nüxü nadaugü ga wena

nax inaxügüxü ga guma yexwacaxüne
ga Tupanapata. Rü yexgumarüxü ta ga
togü rü norü taãxëmaxã tagaãcü aita
naxügü. ¹³Rü yemaacü taxúema nüxü
tacuax rü nataãxëgü rüexna
nangechaügü yerü yema auxexü rü
yema taãxëgüxü rü wüxigu aita naxüe
rü yáxüguma nüxü naxínüe.

**Norü uanügü inayachaxächigüxëxë nax
naxügüaxü ga guma Tupanapata**

4 ¹⁻²Rü yexguma yema norü uanügü
nüxü cuaxgügu nax wena
namexëëgüaxü ga guma Tupanapata ga
yema duüxügü ga Yudátanüxü rü
Bëyamítanüxü ga Babiróniaanewa ne
ixü ga Yerucharéücax woeguxü, rü
nüma ga norü uanügü rü
Chorobabéxütawa rü Yochuéxütawa rü
yema togü ga ãëxgacügüxütawa
ínayadaugü. Rü ñanagürügü nüxü:
—iTaxú i toxna penachuxuxü nax pexü
tarüngüxëëgüxü nawa i ñaa puracü! Erü
toma rü ta pexruxü nüxü tayaxögü ya
yimá perü Tupana. Rü naxcax
ítanaguuxü ga torü ámaregü ga
yexguma Achíriaanearü ãëxgacü ga
Echaradóü nua toxü gagügumama
—ñanagürügü. ³Natürü nüma ga
Chorobabé rü Yochué rü yema togü ga
ãëxgacügü ga iyaxü, rü nanangãxügü rü
ñanagürügü: —Taxucürüwama pemaxã
wüxigu tanaxü ya daa torü Tupanapata.
Rü marü toxicatátama tanaxü ya napata
ya Cori ya torü Tupana, yerü yemaacü
nixí ga tomaxã nüxü yaxuxü ya Chíru
ga Pérchiaanecüãxarü ãëxgacü
—ñanagürügü. ⁴Rü yexguma ga nüma
ga yema uanügü ga yema naanegu
ãxchiügüxü rü inanaxügü nax chixri

yema Iraéanecüãxgüchiga yadexagüxü
nax íyachaxächigüxüçax ga yema
puracü.

.....

⁸Rü yexguma Arteyére rü
Pérchiaanecüãxarü ãëxgacü yixíxgu, rü
yema Iraéanecüãxgüarü uanügüarü
ãëxgacü ga Rexú rü nanamu ga norü
poperaarü ümatüruxü ga Chíchái nax
Arteyérexütawa namuaxü ga wüxi ga
popera ga chixexü tümachiga ga
guxema Yerucharéücüãxgü ga ñaxü:

.....

¹²“Rü cuxü nüxü tacuaxëxë, Pa
Ãëxgacüx, rü ngëma Yudfugü ga
Iraétanüxügü ga Yerucharéücax
woeguxü ga Babiróniaanewa ne íxü, rü
ñuxma rü wena nanamexëëgü ya yima
norü íane i ngëma duüxügü i taxúega
ínüexü rü chixexü ügüxü. Rü marü
inanaxügü nax namexëëgüaxü i norü
íanearü poxeguxütápux rü marü
nananucu ga norü Tupanapataarü
nutagü ya natapüxparagü nawa
rütogüne”, ñaxü.

.....

¹⁷Rü yexguma nüma ga ãëxgacü ga
Arteyére nayaxuxgu ga yema popera, rü
nanangãxü rü ñanagürü: “Pa ãëxgacüx,
Pa Rexúx, rü yimá cumucü ya Chíchái
ya poperaarü ümatüruxü, rü ngëma
cumücügü i íane ya Chamáriawa
ngëxmagüxü, rü guxüma i cumücügü i
taxtü i Eufatéarü oéstewa ngëxmagüxü,
rü pexü charümoexë. ¹⁸Rü ngëma perü
popera i chauxcax nua pemuxü rü marü
chauxütawa nangu rü ngëmaacü nüxü
chacuax i perü ore i chomaxã nüxü
pixuxü. ¹⁹Rü marü chanamu i chorü
ngüxëëruügü nax poperatanügu naxcax

nadaugüxüçax i nachiga i ngëma duüxügü i Yerucharéüçiax. Rü yema poperawa rü nüxü nayangaugü nax ngëma nüxü yaxuxü nax aixcúma yixixü rü ngëma duüxügü rü yema nüxíraxügüxü ga Pérchiaanecüãxarü ãëxgacügüçax nügü nanutaquexegüxü nax nügü namaxã nadaüxüçax, yerü tama yema ãëxgacügüga naxínüechaü. ²⁰Rü ngëxgumarüxü ta nüxü itayangau rü nüxcümaxüchima rü nayexmagü ga norü ãëxgacügü ga iporaxüchixü ga namaxã icuáxü ga guxüma ga naanegü i taxtü i Eufrátearü oéstewaama ngëxmagüxü. Rü yema naanegücüçax ga naxmëxwa yexmagüxü rü nüxü nanaxütanügü ga taxü ga diëru. ²¹Rü ngëmacax chanaxwaxe nax ípeyachaxächitanüxëëxü i ngëma duüxügü i norü ñanearü mexëëwa puracüexü, ñuxmatata wena nüxna chaxãga nax ngëma puracü naxügüxüçax. ²²Rü tama name nax ngëma nüxü perüdaunümarexü erü taxü i guxchaxü tá chaüxçax ínanguxëëgü i ngëma duüxügü ega tama nüxna pedaüxgu”, ñanagürü ga norü poperawa. ²³Rü yexguma naxütawa nanguxgu ga yema ãëxgacü ga Arteyérearü popera, rü Rexü rü Chíchái ga poperaarü ümatüruxü, rü namücügü rü nüxü nadaumatügü. Rü yexgumatama ga guxüma ga nümagü rü Yerucharéüwa naxí, rü nuäcü Yudfugüxü namu nax íyachaxächigüxüçax nax napuracüexü. ²⁴Rü yemaacü nixí ga íyachaxächixü ga Tupanapataarü mexëë ga Yerucharéüwa. Rü tama nawa napuracüe ñuxmata Darü taxre ga

taunecü inguxëxë nax ãëxgacü yixixü ga Pérchiaanewa.

**Wena inanaxügüe ga puracü
Tupanapata nax namexëëgüxü**

5 ¹Rü nüma ga Tupanaarü orearü uruügü ga Aguéu rü Chacarí ga Ídu nane, rü yema Yudfugü (ga Iraétanüxügü) ga Yudáanecüãxmaxã, rü Yerucharéüçiaxmaxã nüxü nayarüxugüe ga yema ore ga Cori ya Tupana namaxã nüxü ixuxü. ²Rü yexguma ga Chorobabé ga Charatié nane rü Yochué ga Yochadá nane rü wenaxarü inanaxügüe ga nax nawa napuracüexü ga Tupanapataarü mexëë ga Yerucharéüwa. Rü nüma ga Tupanaarü orearü uruügü rü ta nüxü narüngüxëëgü. ³⁻⁴Natürü nüma ga Tanái ga taxtü ga Eufrátearü oéstewaamaarü ãëxgacü, rü nüma ga Chetáru-Bonái rü namücügü, rü Yerucharéüwa naxí rü Yudfugüna (Yudátanüxüna) nayacagü rü ñanagürügü: —¿Texé pexü tamu nax wena penamexëëxü ya daa Tupanapata rü nax peyamexëëgüxü i norü poxeguxü ya daa ñane? —ñanagürügü. Rü ñuxüchi naxçax ínaca ga tümaéga ga guxema Tupanapataarü mexëëwa puracüexe. ⁵Natürü nüma ga Tupana rü nüxna nadau ga yema Yudfugü ga yema puracümaxã icuaxgüxü. Rü yemaacü nataxuma ga texé nüxna nachuxuxü nax napuracüeamaxüçax. Rü yoxni ga yema Yudfugüarü uanügü rü Pérchiaanecüãxarü ãëxgacü ga Darfucax nanaxümatü ga wüxi ga popera nax nüma namexëëãxüçax ga yema guxchaxü. ⁶Rü yema popera ga Darfuxütawa namugüxü ga Tanái, rü

Chetáru-Bonái, rü norü ngüxêëruüügü ga
 ãëxgacügü rü ñanagürügü: ⁷“Pa
 ãëxgacüx, Pa Daríux, rü cuxü
 tarüumoxëgü. ⁸Rü cumaxã nüxü tixu nax
 Yudáanewa Ítayadauxü ya napata ya
 yimá Yudíugüarü Tupana ya guxãétüwa
 ngëxmacü. Rü yima rü ínanamexëëgü
 nuta ya itaxüchicümaxã. Rü ngëma
 natapüx rü meama mürapewamaxã
 natüchiã. Rü ngëma puracü rü naxcax
 napaxaãëgü rü ngëmacax paxama inixü.
⁹Rü yema Yudíugü ga yema
 puracümaxã icuaxgüxüna taca nax texé
 tixixü ga namuxe nax wena
 namexëëgüaxüçax ya yima Tupanapata,
 rü mürapewamaxã nax napexgüãxü i
 nachíwaama. ¹⁰Rü naxcax Ítagü ta
 ga naégagü ga yema puracümaxã
 icuaxgüxü rü tayawügüéga nax
 ngëmaäcü cumaxã nüxü tixuxüçax, Pa
 ãëxgacüx. ¹¹Rü nüma rü toxü
 nangãxüügü rü ñanagürügü: ‘Toma rü
 yimá Tupana ya daxügüxü i naanearü
 üruxü rü ñoma i naanearü üruüarü
 duüxügü tixigü. Rü Ítanamexëxë ya daa
 napata ga nüxcümaxüchima ga torü
 oxigüarü ãëxgacü ga Charumóü üxüne’,
 ñanagürügü. ¹²Rü nüxü nixugügü ta rü
 ñanagürügü: ‘Rü torü oxigü rü Tupana
 ya daxüçüãxü nanuxëëgü rü yemacax
 nüma ga Tupana rü ãëxgacü ga
 Nabucudonochómëxëgu nanayixëxë. Rü
 nüma ga Nabucudonochó rü nagu
 napogü ga guma Tupanapata, rü yema
 duüxügü rü ínanayauxü rü
 Babiróniaanewa nanagagü’,
 ñanagürügü. ¹³Rü nüma i Yudíugü rü
 nüxü nixugüé rü guma nüxíraxüçü ga
 taunecü ga nagu Babiróniaanearü
 ãëxgacü yixicü ga Chíru, rü nüma ga

guma ãëxgacü rü nanaxunagü nax guma
 Tupanapata rü tá wena namexëëgüaxü.
¹⁴Rü yexgumarüxü ta nüxü nixugüé rü
 nüma ga ãëxgacü ga Chíru rü marü
 nanawoëguxëxë ga yema
 Tupanapataarü yemaxügü ga
 úirunaxcax rü diërumünaxcax ga
 Nabucudonochó Yerucharéüwa dexü rü
 Babiróniaanewa yexmane ga norü
 tupanapatagu yanuxü. Rü nüxü nixugüé
 ta rü yema Tupanapataarü yemaxügü rü
 ãëxgacü ga Chíru rü wüxi ga yatü ga
 Chebacháragu áëgaxüna nanana. Rü
 nüma ga Chebachára nixí ga Chíru nüxü
 unetaxü nax Yudáanecüãxariü ãëxgacü
 yixixüçax. ¹⁵Rü nüma ga ãëxgacü ga
 Chíru rü guma Chebacháraxü namu nax
 yima Yerucharéüwa ngexmane ya
 Tupanapatawa nanaaxüçax ga yema
 yemaxügü. Rü ñuxüchi nanamu nax
 wena namexëëgüaxüçax ga Tupanapata
 ga noxritama ínaxüxüwa. ¹⁶Rü
 yemawena ga nüma ga Chebachára rü
 Yerucharéüwa naxü, rü nananucu ga
 guma nutagü ya natapüxparagü nawa
 rütogüé ya yima Tupanapata. Rü ga
 duüxügü rü yexgumaüçüxü rü
 ínanaxügüé ga nawa nax napuracuexü,
 natürü taxüta ningü. ¹⁷Rü ngëmacax i
 ñuxmax, Pa ãëxgacüx, rü cuxna naxcax
 taca nax naxcax cudaduxü i
 Babiróniaanearü poperatanügu nax
 nüxü cucuáxüçax ngoxi aixcüma yixixü
 nax ãëxgacü ga Chíru naxunagüxü nax
 wena naxügüaxüçax ya yima
 Tupanapata i Yerucharéüwa. Rü
 ñuxüchi cuxna naxcax taca nax tomaxã
 nüxü quixuxüçax rü taxacü yixixü i
 nagu curüxñüxü i cuma i ngëmachiga”,
 ñanagürügü ga norü poperawa.

6 ¹Rü yexguma ga nüma ga ãëxgacü ga Daríu rü norü duüxügüxü namu ga naxcax nax nadaugüxüçax ga yema mugüpane ga Chíru ümatüxü natanügu ga nüxcümaüxü ga poperagü ga Babiróniaanewa yexmagüxü. ²Rü yema popera ga nagu naxümatüxü ga yema Chíruarü mugü rü nüxü inayangaugü nagu ga guma ãëxgacüpata ga ñane ga Ebatánawa yexmane ga Médiaanewa. ³Rü yema mu ga yema poperagu ümatüxü rü ñanagürü: “Guma nüxíraxücü ga taunecü nagu ãëxgacü yixícü ga Chíru rü ñaxü ga mu naxunagü: ‘Rü guma Tupanapata ga Yerucharéüwa yexmane ga Yudíugü norü ámare ga naxüna nawa ígugüxüne, rü tanaxwaxe i wena namexëxë, rü yima naparagü rü mea inapugü. Rü ngëma norü máchane rü 27 i métruarü ngäxü tá nixí, rü ngëma norü tachiü rü 27 i métruarü ngäxü tá nixí. ⁴Rü natapüxarü ügü rü tomaepüxchimüxü ya nutagü ya itacü tá nixí. Rü yimaétüwa rü ngexwacaxüxü i mürapewa i yaxcüxü tá nixüchigü. Rü chorü diëruarü dauruxü tá nixí i naxütanüxü i guxüma i ngëma puracü. ⁵Rü Tupanapataarü yemaxügü i úirunaxcax rü diërumünaxcax ga Nabucudonochó Tupanapatawa dexü, rü tanaxwaxe i Yerucharéüçax tanawoeguxëxë rü nagu tayanü ya yima Tupanapata ya wena tá üxüne, erü woetama ngëma nixí i nachica” ñanagürü ga yema Chíruarü poperawa. ⁶Rü yexguma ga nüma ga Pérchiaanecüäxarü ãëxgacü ga Daríu rü nanaxümatü ga wüxi ga popera naxcax ga Tanái ga taxtü ga Eufrátëarü oéstewaamaarü ãëxgacü, rü

Chetáru-bonái rü norü ngüxëëruügü ga ãëxgacügü ixígüxü ga yema naanewa. Rü norü poperawa rü ñanagürü: “iTaxütáma nüxü penaguxchaxëxë i ngëma Yudíugü nax wena naxügüäxü ya yima Tupanapata! Rü ngëma noxrirüxü i nachicagu tátama nanaxügü. ⁷iRü taxütáma penachixewe ya yimá Yudaanecüäxarü ãëxgacü rü ngëma togü i duüxügü i ngëma puracümaxä icuaxgüxü! ⁸Rü ñuxüchi pemaxä nüxü chixu nax perü diërumaxä nüxü perüngüxëëgüxü i ngëma Yudíugü i ngëma puracümaxä icuaxgüxü nax naxügüäxüçax ya yima Tupanapata. Rü ngëma diëru i perü naanewachigütama perü duüxügütanüwa ngíxü peyaxucümaxä tá nixí i paxa penaxütanüxü i ngëma Tupanapataarü mexëxë nax ngëmaäcü tama íyachaxächixüçax i ngëma puracü. ⁹Rü ngëma chacherdótegü i Yerucharéüwa ngëxmagüxü rü chanaxwaxe i nüxna penamugü i ngëma wocaxacügü rü carnérugü i nanaxwaxegüxü nax naxcax yagugüäxü ya yimá Tupana ya dauxüwa ngëxmacü. iRü naétü nüxna penaxä i trígutexe, rü bínu, rü yucüra, rü oríbuarü chíxü i wüxichigü i ngunexügügu rü tagutáma nixüye! ¹⁰Rü ngëmaäcü tá nüxü natauxcha nax yimá daxügücü ya Tupanacax yagugüäxü i taxacü i namaxä nataaxëxü rü ñuxüchi chaüxcax rü chauxacügüçax nayumüxëgüxüçax. ¹¹Rü ngëxguma chi texé tama naga ñnügu i ñaa chorü mu, rü name nixí i wüxi ya tümapataarü omüta tayaxu rü yimamaxä tüxü tapai nax ngëxma tayuxüçax ya yixema tama naga ñnüxe. Rü yima tümapata rü

ngëxma narüxo rü naachinaxãgüxica
ngéma nayaxü. ¹²Rü yimá Tupana ya
nügüçax nüxü unetacü ya yima ñane ya
Yerucharéü rü tá nanachixexë i
ngexürüüxümare i nachixüane rüxna
norü äëxgacü i tama yanguxëëxü i ñaa
chorü mu, rü nachixexëëxü ya yima
Tupanapata. Rü choma i Daríu nixí i
chanaxunagüxü i ñaa mu. Rü ngëmacax
chanaxwaxe i aixcüma naga naxínüe”,
ñanagürü ga norü poperawa.

Ningu ga Tupanapata

¹³Rü nüma ga Tanái ga taxtü ga
Eufrátearü oëstewaamaarü äëxgacü rü
Chetáru-bonái rü norü ngüxëëruüüü rü
paxama naga naxínüe ga yema mu ga
äëxgacü ga Daríu unagüxü. ¹⁴Rü yemaacü
ga nüma ga yema Yudíuü ga yema
puracümaxã icuaxgüxü rü nayadaxëëgü
ga nax napuracüexü. Rü Tupanaarü
orearü uruüüü ga Aguéu rü Chacaría ga
Ídu nane rü Tupanaarü oremaxã poraäcü
nanataãxëëxë. Rü yemaacü ga guma
Tupanapataarü mexëxë rü ningu yema
Tupana nüxü ixuxürüxü rü yema Chíru rü
Daríu rü Arteyére ga Pérchiaanecüãxarü
äëxgacüü unagügüxürüxü. ¹⁵Rü
yexguma 6 ga taunecü äëxgacü yixígu ga
Daríu ga Pérchiaarü naanewa, rü
yexguma nixí ga nax yanguxü ga guma
Tupanapata, meama Adáarü tauemacüarü
tomaepüxarü ngunexüüga (18 febréru).
.....

Édra rü namücügümaxã Yerucharéüwa nangugü

7 ¹Rü yexguma Arteyére rü
Pérchiaanecüãxarü äëxgacü yixígu,
rü nayexma ga wüxi ga chacherdóte ga

Yudíu ga Édragu äégacü. Rü nüma rü
nüxcümaücü ga Aróütaxa nixí.

.....

⁶Rü nüma ga Édra rü wüxi ga
nguxëëtaeruxü nixí, rü meama nüxü
nacuax ga Tupanaarü mugü ga Moiché
ümatüxü. Rü wüxi ga ngunexüüga rü
äëxgacü ga Arteyérena naca nax
Yerucharéüçax namueguaxüçax. Rü
nüma ga äëxgacü rü naga naxínü, yerü
Tupana rü poraäcü Édraxü narüngüxëë.
Rü yemaacü ga Édra rü Babiróniaanewa
inaxüächü rü Yerucharéüçax natáegu.
⁷⁻⁹Rü yexguma marü 7 ga taunecü
äëxgacü yixígu ga Arteyére rü natáegu
ga Édra. Rü namaxã nawoegu ga
wüxitücumü ga Iraétanüxüüü. Rü
yematanüwa nayexmagü ga
chacherdótegü rü Lebítanüxüüü, rü
wiyaetanüxüüü, rü Tupanapataarü
íãxarü dauruüüü, rü Tupanapataawaarü
ngüxëëruüüü. Rü yemamaxã inaxüächü
ga Édra meama nüxíraxücü ga
tauemacüarü ügügu. Rü Yerucharéüwa
nangugü meama guma norü 5 ga
tauemacüarü ügügu yerü Tupana rü
poraäcü nüxü narüngüxëë. ¹⁰Rü nüma
ga Édra rü aixcüma nagu narüxínü nax
Tupanaarü mugüwa nangüxü rü nagu
nax namaxüxü rü yema togü ga
Iraéanecüãxgüxü nax nangüxëëxüçax
ga yema Tupanaarü mugü. ¹¹⁻¹²Rü nüma
ga Édra rü wüxi ga nguxëëtaeruxü ga
meama guxüma ga Tupanaarü mugüxü
cuácü nixí. Rü yexguma Babiróniaanewa
inaxüächichaxüxgu ga Édra, rü nüma ga
äëxgacü rü Édrana nanaxã ga wüxi ga
popera ga ñaxü: “Choma i äëxgacü i
Arteyére rü cuxü charümoexë Pa
Chacherdóte, Pa Édrax. Rü cuma rü

wüxi i nguxêêtaeruxû i meama Tupana ya daxüguciarü mugûxû cuáxe quixí.
¹³Rü marü chanaxunagü i wüxi i mu nax ngêmaâcü guxûma i Iraétanüxügü i choxmexwa ngêxmagûxü rü naxwaxegûxü nax cumaxã Yerucharéûcax nawoeguxû, rü marü name nax cuwe naxîxû. Rü ngêxgumarüxü ta i ngêma Lebítanüxügü rü chacherdótegü rü marü name nax nawoeguxû. ¹⁴Ertü choma i âêxgacü, rü ngêma 7 i chorü ngûxêêruügûmaxã rü ngêma cuxû tamu nax mea cuyangugûxûcax nax ñuxâcü ínamaxêxû i ngêma cutanüxügü i Yudáanewa, rü ñane ya Yerucharéûwa, rü ngoxi nagu ínamaxê i ngêma curü Tupanaarü mugü i cuxû ngêxmaxû. ¹⁵Rü ngêxgumarüxü ta cuxna taxãga nax cuyanaxûcax i ngêma diêrumü rü úiru i choma i âêxgacü rü chorü ngûxêêruügûmaxã torü ngúchaûmaxã cuxna taxãmaregûxû naxcax ya perü Tupana ya Yerucharéûgu âpatacü. ¹⁶Rü ngêxgumarüxü ta rü name nixí i cutanüxügü i duûxügü rü chacherdótegü i Babiróniaanewa ngêxmagûxûtanüwa cunade i ngêma diêrumü, rü úiru, rü âmaregü i norü ngúchaûmaxã inaxãgûxû naxcax ya yima Tupanapata ya Yerucharéûwa ngexmane. ¹⁷Rü ngêma diêrumaxã rü tá naxcax cutaxe i wocaxacügü, rü carnérugü rü carnéruxacügü wüxigu namaxã i âmaregü i trígu rü bínu. Rü ngêma âmaregü tá nixí i Tupanapataarü âmarearü guchicaxûwa ícuyaguxü i ngêxguma Yerucharéûwa pengugügu. ¹⁸Rü ngêma diêru rü úiru íyaxûxûmaxã rü cuma rü cumücügü rü tá naxcax petaxe i ngêma pema nagu perüxînüegu

rü Tupanaarü ngúchaû íxîxû. ¹⁹Natürü ngêma curü Tupanapataarü ngêmaxügü i pexna taxãxû rü cunaxwaxe nax cumatama yima Tupanapatagu cuyanuxû i Yerucharéûwa. ²⁰Rü ngêxguma iyataxuxgu i diêru naxcax ya yima Tupanapata rüexna taxacü i to i puracü i Tupanacax pexûxchaûxû, rü marü name i chorü diêruarü dauruxûxûtawa naxcax ícuca. ²¹Rü pemax, Pa Âêxgacügüx i Taxtü i Eufrátëarü Oéstewaama Ngêxmagûxe i Diêrumaxã Icuaxgûxex, rü choma i Pérchiaanecûâxarü âêxgacü i Arteyére rü pexcax chayamupane i ñaa mugü: 'íRü nüxna penaxã i guxûma i taxacü i pexûtawa naxcax ínacaxaxû ya yimá chacherdóte ya nguxêêtaeruxû ya Édra i meama Tupana ya daxûcüâxarü mugûxû cuáci! ²²Rü name nixí i nüxna penaxã ñuxmata 3,600 quíru naguxû i diêrumü rü 22,000 lítru naguxû i trígu, rü 2,200 lítru nagucü ya bínu, rü 2,200 lítru naguxû i chíxû. Rü yima yucüra ya nüma naxcax ínacaxacü írü nüxna penaxã! ²³Rü ngêxgumarüxü ta i ngexûrüüxûmare i ngêmaxügü i Tupana ya daxûcüâx naxwaxexû i napatacax, rü name nixí i nüxna penaxã nax tama chaûxcax rü chaunecax poxcu ínanguxêêxû.' ²⁴Rü ngêxgumarüxü ta chanaxunagü i ñaa mu: 'Rü ngêma chacherdótegü, rü Lebítanüxügü, rü wiyaetanüxügü, rü íâxarü dauruügü rü guxûma i ngêma togü i Tupanapatawa puracüexû, rü tama chanaxwaxe nax âêxgacüaxû nax naxûtanügüaxû.' ²⁵Rü cumax, Pa Édrax, rü name nixí i nagu quixû i ngêma cuax i Tupana cuxna âxû. Rü ngêmaâcü ngêma naanegü i taxtü i

Eufrátéarü oéstewaama ngëxmagüxü i duüxügüçax tá nüxü cuxuneta i ãëxgacügü i duüxügüarü guxchaxüarü mexëëruxü ixigüxü, rü ãëxgacügü i mea ngëma duüxügümaxä icuáxü. Rü ngëxguma nangemagu i duüxügü i tama curü Tupanaarü mugüxü cuaxgüxü, rü name nixi i cuma cunangüexëxë. ²⁶Rü ngexerüxüxemare ya tama naga ñnüxe i ngëma curü Tupanaarü mugü rü chorü mugü irü noxtacüma tüxü pimäx rüexna tüxü ípetäxüchi i perü naanewa, rüexna tüxna penapuxü i tümaarü ngëmaxügü, rüexna tüxü pepoxcu!” ñanagürü ga ãëxgacü ga Arteyére norü poperawa.

Édraarü Yumüxë

²⁷Rü yexguma ga Édra rü nayumüxë rü ñanagürü: “Pa Torü Qxigüarü Tupanax, rü cuma rü cumeciümaxüchi. Rü ngëmacax ãëxgacüãëwa ícunangüxëxë nax yima cupata ya Yerucharéüwa ngexmane wena namexëëgüaxüçax i curü duüxügü. ²⁸Rü moxë cuxna chaxä, Pa Tupanax, erü cuxü changechaütümüxü napëxewa ya ãëxgacü, rü ngëma 7 i namücügü, rü guxüma i norü ngüxëëruügü. Rü chapora erü cumax, Pa Tupanax, chauxütawa cungexma rü ngëmacax choxü natauxcha nax nüxü chanangüchaüxëxëxü i ñuxre i chautanüxügü i Iraétanüxügüarü ãëxgacügü nax chowe Yerucharéüçax nawoeguxü”, ñanagürü ga norü yumüxëwa.

.....

Tupanapatawaarü puracütanüxügü

8 ¹⁵Rü choma ya Édra rü natü ga Abácutügu chanangutaquëxëxë ga yema duüxügü ga chomaxä

Yerucharéüçax woeguchaüxü. Rü yexma tapegü ga tomaepüx ga ngunexü. Rü yéma yoxni tayawüguéga ga duüxügü rü chacherdótegü ga yéma ngugüxü. Rü yemaacü nüxü tacuax rü nataxuma ga Lebítanüxü ga nüechamatama yéma íxü. ¹⁶Rü yemacax Eriechéçax, rü Ariéçax, rü Chemaíacax, rü Erünatáüçax, rü Yaráçax, rü to i Erünatáüçax, rü Natáüçax, rü Chacaríacax, rü Mechuráüçax changema, yerü nümagü nixi ga Lebítanüxüarü ãëxgacügü yixüxü. Rü yexgumarüxü ta naxçax changema ga Yoíarí rü Erünatáü ga nguxëëtaeruügü ixigüxü. ¹⁷Rü Cachipíaarü ñanewa chanamugü ga yema duüxügü nax Lebítanüxüarü ãëxgacü ga Ídumaxä, rü namücügü ga ngüxëëruügü ga yema ñanearü Tupanapatawa puracüexümaxä yanadexagüxüçax rü namaxä nüxü yaxugüxüçax nax toxütawa namugüaxüçax i Lebítanüxügü nax yima Tupanapata ya Yerucharéüwa ngexmanewa toxü nangüxëëgüxüçax. ¹⁸Rü Tupana rü tomaxä namecüma, rü yemacax toxütawa nanamu ga Cherebía ga meama poperaxü cuácü ga Lebítanüxü ga Marítaxa ixücü. Rü nüma ga Cherebía rü toxütawa nangu wüxigu namaxä ga nanegü rü naeneegü ga meama 18 ga duüxügü ixigüxü. ¹⁹Rü yexgumarüxü ta Tupana yéma nanamugü ga Achabía namaxä ga namücü ga Yechaía ga Merári nane ixücü. Rü namaxä ñnangugü ga nanegü rü naeneegü ga meama 20 ga duüxügü ixigüxü. ²⁰Rü naétüwa rü ñnangugü ga 220 ga Tupanapatawaarü ngüxëëruügü. Rü nüxcüma rü ãëxgacü ga Dabí nixi ga

yemaacü inanucü naxcax ga
Tupanapataarü puracü. Rü guxüma ga
yema 220 ga ngüxêëruügu rü nayawügu
ga naégagü. ²¹Rü yemawena rü
chanaxunagü nax aureäcü
tayumüxêgüxü natü ga Abácutüwa nax
Tupanamaxâ nüxü tixugüxücax ga torü
chixexügü, rü Tupanana naxcax
tacaxaxücax nax mea toxü
naxüpetüxücax i namawa, rü toxna rü
toxocügüna nadauxücax wüxigu
namaxâ i guxüma i torü ngëmaxügü i
namaxâ itaxîxü. ²²Yerü chorü âne nixî
ga âëxgacüxütawa naxcax íchacaxaxü
ga churaragü ga cowarugu íxü nax torü
uanügüna toxü ínapoxüxücax i namawa,
yerü yexguma taxüta itaxîächigu rü
marü âëxgacümaxâ nüxü tixugü nax
Tupana tüxü rüngüxêëxü ya yíxema
naxcax daugüxe, natürü tüxü napoxcu
ya guxâma ya tama naga ínüexe. ²³Rü
ngëmacax aureäcüma tayumüxêgü rü
Tupanana tacagüe nax toxna
nadauxücax. Rü nüma rü aixcüma toxü
nangâxüga.

.....

³¹Rü natü ga Abácutüwa itaxîächi
meama nüxíraxücü ga tauemacüarü 12
arü ngunexügu nax Yerucharéüwa
taxîxü. Rü Tupana rü namawa toxna
nadau rü toxü ínapoxü nüxna ga torü
uanügü rü ngítaaxgüxü. ³²Rü yexguma
Yerucharéüwa tangugügu, rü tomaepüx
ga ngunexü tarüngügü.

.....

³⁵Rü yemawena rü wüxichigü ga
toma rü naxüna ítagu naxcax ga guma
torü Tupana. Rü guxüma ga
Iraétanüxügüégagu rü ítanagu ga 12 ga
wocaxacügü rü 96 ga carnérugü rü 77

ga carnéruxacügü. Rü torü
chixexügüarü ütanüruxü rü ítanagu ga
12 ga chíbugü. ³⁶Rü toma rü yema
nachixüanegü ga taxtü ga Eufrátëarü
oéstewaamaarü âëxgacügüna tanaxâ ga
yema popera ga Pérchiaanecüâxarü
âëxgacü toxna âxü. Rü nümagü rü paxa
toxü narüngüxêë nax wena tanaxüxücax
ga guma Tupanapata.

Édra rü Tupanamaxâ nüxü nixu ga Iraéaanecüâxgüarü chixexü

9 ¹Rü yemawena ga yema
Iraéanecüâxgüarü âëxgacügü ga
marü nüxíra Yerucharéüwa ngugüxü rü
chaxcax naxî rü chomaxâ nüxü
nayarüxugüe rü ñanagürügü: “Muxüma
i ngëma tatanüxügü i Iraéanecüâxgü ga
nüxíra tomaxâ woeguxü, rü woo
chacherdótegü rü Lebítanüxügü rü tama
nügüxü nüxü naxoxoxgü i nacümagü i
chixexügü i nagu naxîxü i ngëma togü i
duüxügü i nua tórü naanegu
yaxâchiügüxü. Natürü ngëma
tatanüxügü rü woo poraäcü
Tupanapexewa nachixe nax ngëma
togücümagu nax naxîxü, natürü nagu
naxíama i nacümagü i ngëma
Canaáütanüxügü rü Itítatanüxügü, rü
Ferechéutanüxügü, rü
Yebuchéutanüxügü, rü Amóütanüxügü,
rü Moátanüxügü, rü Equítuanecüâxgü,
rü Amoréutanüxügü. ²Yerü nüma i
tatanüxügü rü nanegü rü marü
nixâxmaxgü namaxâ i ngëma togü i
duüxügüxacügü i nua tórü naanegu
yaxâchiügüxü i tama Tupanaaxü
yaxögüxü. Rü yemaacü ga Tupanaarü
duüxügü rü yema tama yaxögüxü ga
duüxügümaxâ nügü narüxücutanü. Rü

tatanüxügü i ãëxgacügü nixĩ ga nüxıra inaxügüxü nax nagu naxixü ga yema chixexü”, ñanagürügü choxü. ³Rü yexguma yema orexü chaxinügu rü chorü ngechaümaxã chaugü charügáutechiru rü chaugü chapuxüyae rü chaugü chapuxüchinagu, yerü poraäcü chauãëwa nangux ga yema. ⁴Rü guxüma ga yema Iraéanecüãxgü ga norü Tupanaarü poxcucax müëxü nagagu ga tatanüxügüarü chixexügü rü chauxütawa nayarütogü. Rü choma rü chorü ngechaümaxã yematama chauchicawa charüto ñuxmata nawa nangu ga yema yáuanecüarü ora ga nagu Tupanacax yagugüãxü ga ãmaregü. ⁵Rü yexguma yema orawa nanguxgu rü marü choxü nangupetüxüra ga nax changechaüxü. Rü charügáuxchiruãcüma ichanaxügü nax chayumüxëxü. Rü Cori ya Tupanamaxã chidexa. ⁶Rü ñachagürü nüxü: “Pa Chorü Tupanax, Pa Chorü Tupanax, rü poraäcü chaxãnexüchi i cupëxewa. Rü tama nüxü chacuax nax taxacü chaxüxü rü ñuxäcü cumaxã chidexaxü. Erü ngëma torü chixexü rü marü nangupetüxüchiamä rü ngëma torü pecädugü rü marü ñoma i naane namaxã nanapá. ⁷Rü nüxcümacürüwa ga torü oxigü rü chixexügu namaxëx rü ñomaxücüxü i toma rü ta nagu ítamaxë. Rü ngëma torü chixexügüga rü toma rü torü ãëxgacügü rü torü chacherdótegü rü naxmëxgu tayi i ngëma to i nachixüanecüãxgüarü ãëxgacügü i tama cuxü yaxögüxü. Rü nümagü rü toxü ínayauxü rü toxcax nangixgü rü duüxügüpëxewa toxü nacugüe. Rü ngëmatama nixĩ i ñuxma toxü

ngupetüxü. ⁸Natürü i ñuxmax, Pa Corix, Pa Torü Tupanax, rü ngëma nax tomaxã cumecümaxügüga rü toxü cunatauxchaxëxë nax ñuxre i toma rü wena ñaa naane i cuma cuxüünexëxüçax tawoeguxü nax nagu taxächüügüxüçax. Rü cuma rü wüxi i ngexwacaxüxü i ñn toxna cuxã, rü ngëmaäcü paxaãchi toxü cutaãxëxë naétüwa i torü guxchaxügü. ⁹Rü woo to ga ãëxgacümëxëwa nax tangëmagüxü natürü i cumax rü tama toxü ícuwogü. Rü ngëma Pérchiaanecüãxarü ãëxgacügüãëwa ícunanguxëxë nax tomaxã namecümagüxüçax. Rü toxna cudau nax ñuxma rü ta tamaxëxüçax, rü ngëmaäcü tawoeguxüçax, rü wena noxrixüxü ga nachicagutama tanaxüxüçax ya yima cupata. Rü cumax, Pa Tupanax, rü toxna cudau i guxüma i ñaa naane i Yudáanewa rü daa íane ya Yerucharéüwa. ¹⁰Natürü i ñuxmax, Pa Tupanax írü taxacüxü tá cumaxã tixuxü nawena i guxüma i ngëma chixexü i taxüxü. Erü aixcüma nixĩ nax tama naga taxinüexü i curü mugü”, ñachagürü ga chorü yumüxëwa.

.....

Yudíugü rü ínanawoxü ga yema ngexügü ga to ga nachixüanecüãxgü ixigüxü

10 ¹Rü yexguma ñaxtüanegu chayangücuchigu norü toxmãxtawa ga guma Tupanapata, rü yéma chaxauxãcüma chayumüxë, rü Tupanamaxã nüxü chixu ga torü chixexügü. Rü yexgumayane yéma nangugü ga muxüma ga yatügü rü ngexügü rü buxügü rü chauxütagu nangutaquexe rü wüxigu chomaxã

naxauxe. ²Rü yexguma nüma ga Checanía ga Yerié nane ga Eráütanüxü ixícü rü ñanagürü choxü: “Rü aixcúma nixí i Tupanapexewa chixexü ixügüxü. Erü ngexügü i to i nachixüanecüâx ixügüxü i tama Tupanaaxü yaxögüxümaxá tixâxmaxgü i yixema i Iraéanecüâxgü. Natürü nangexmaama nax ñuxácü Tupanapexewa namexêêxü i ngêma torü chixexü. ³Rü ngêmacax tórü Tupanapexewa tá nüxü tixu nax tüxna tixígachixúcax ya yíxema toxmaxgü ya tama Tupanaaxü yaxögüxe rü yíxema toxocügü ya tümawa toxü ngêxmagüxe. Rü ngêmaácü ngêma cuma rü ngêma togü i duüxügü i aixcúma Tupanaga ñnüexü tomaxá nüxü ixuxürüxü tá naga taxínüe ya tórü Cori ya Tupanaarü mugü. ⁴Rü inachi rü naxü i ngêma Tupana cuxü muxü nax cunaxüxü! Rü toma rü tá cuga taxínüe. Iêcü tomaxá nüxü ixu nax ñuxácü tá tanamexêê i ngêma chixexü i taxüxü!” ñanagürü.
.....

¹⁰Rü yexguma ga choma ga chacherdóte ya Édra rü ichachi rü

ñachagürü: “Pema rü poraácü chixexü pexü erü namaxá pixâxmaxgü i ngêma ngexügü i to i nachixüanecüâx ixügüxü. Rü ngêmaácü penayexeraxêê i tórü chixexügü i Tupanapexewa.

¹¹Rü ñuxma rü penaxwaxe i tórü oxigüarü Tupanapexewa penaxü i ngêma nüma nanaxwaxexü rü nüxü pixu nax aixcúma chixexü pexügüxü. Rü ngêmacax pemaxá nüxü chixu irü nüxna pixígachi i ngêma duüxügü i tama yaxögüxü rü ngêma ngexügü i to i nachixüanecüâxgü ixügüxü!” ñachagürü. ¹²Rü yexguma yemaxü naxínüegu ga guxüma ga yema duüxügü rü tagaácü nanangâxügagü rü ñanagürügü: “Ngêmaácü tá tanaxü i ngêma toxü cumuxü”, ñanagürügü.
.....

⁴⁴Rü guxüma ga yema Iraéanecüâxgü ga to ga nachixüanecüâx ga ngexügümaxá ixâxmaxgüxü rü tümangatügücax tüxü nawoeguxêê wüxigu tümamaxá ga tümamaxügü.